

四庫全書

史部

欽定四庫全書

史部

三吳水考卷二

詳校官監察御史臣周元良

刑部郎中臣許兆椿覆勘

總校官檢討臣何思鈞

校對官編修臣沈清藻

謄錄監生臣周克鵬

欽定四庫全書

史部十一

三吳水考

地理類四 河渠之屬

提要

臣等謹案三吳水考十六卷明張內蘊周大韶全撰內蘊稱吳江生員大韶稱華亭監生其始末則均未詳也初萬曆四年言官論蘇松常鎮諸府水利久湮宜及時修濬乞遣御史一員督其事乃命御史懷安林應訓往應

訓相度擘畫越六載歲功屬內蘊等編輯此  
書前有萬厯庚辰徐栻序稱為水利圖說而  
辛巳劉鳳序壬午皇甫汙序則稱三吳水考  
蓋書成而改名也汙序稱應訓命諸文學作  
而栻鳳序皆稱應訓自著亦復不同考書中  
載應訓奏疏條約皆署銜署姓而不署其名  
似不出於應訓手殆內蘊等纂輯之而應訓  
董其成爾其書分十二類凡詔令考一卷水

源考一卷水道考三卷水年考一卷水官考  
一卷水議考三卷水疏考三卷水移考一卷  
水田考一卷水績考一卷水文考一卷雖體  
例稍冗標目亦多杜撰而諸水之源流諸法  
之利弊一一詳賅蓋務切實用不主著書固  
不必以文章體例繩之矣乾隆四十六年七  
月恭校上

總纂官臣紀昀臣陸錫熊臣孫士毅

總校官臣陸費墀

三吳水考序

夫予江南非古所稱塗泥之域哉然謂厥田下下厥賦下上上錯則尤震澤初定時充貢未博也今國家財賦大半出是所關係鉅計至矣顧澤國源委上自天目下沿東海相距數百里而遙滌洄澎湃百折而星流似未易窺其腴腠予自有四方之役嘗渡錢塘涉豫章浮沅湘暨淮黃沂濟膠萊間試濬水工則念吾土利病視之獨難以地形平壙海潮上下不常每當潦集輒浩漫洚

注四望湖海非若他有崇崗壘壁水速來可防禦宣引  
為也竊謂先正范文正公守吳郡首疏水利為要務予  
每乘閒理棹遨遊目太湖之津煙慨兩澤之悠瀾尋三  
江之故道望禹跡之茫茫沈思久之博聞父老有曰是  
夏駕新洋昔夏忠靖所疏理也是秀水蒲漚澱泖諸湖  
水所經洩也是吳塘顧浦劉河所潴衍也是白茆青陽  
西湖毘晉陵所由入江也是白鶴荊城孟瀆九曲所由  
入江注海也爰稽傳志三吳之地惟常熟多有巨漚而



白茆港視他水獨廣闊而順達於此導之使蘇常東北  
諸水皆由此港以入海而震澤上源自可減殺橫溢之  
勢信乎白茆尤吳中水利之要害者也今流注失宜高  
土浸以淪沒而下者又致淤壅獨柰民生國計何予歎  
曰是即禹貢所謂三江既入震澤底定者與邇閩懷安  
林公茂膺簡命治水茲土非底定之一會乎予撫豫章  
公尹南昌共事治水卒賴宏濟大畧以相成今公按吳  
兩越歲河工告成出水利圖說示予乃熟視之何盡我

地宜若是悉哉公指顧中即貼貼爾席之安抑何神哉  
蓋公行水之道與神禹智同而咨詢營度一不出所云  
三江既入吳松江為正派東婁二江為旁支支派分而  
或疏或濬或節可次第施矣以故太湖諸水注吳淞澱  
泖諸湖水注黃浦崑嘉諸水注劉河白茆而陽城晉昆  
諸水悉便入江入海則水流導長蕩潤州諸水由運河  
入大江則水源節公駐節吾邑督濬白茆復深且廣俾  
可停蓄宣導以入海連年大水得藉宣洩之力不至盡

填溝壑者公疏白茆之功彰彰較著也大都並流不至妨礙野潢不至外逸平潮不至倒注要害之衝罔不疏濬深闊納巨浸而尾閭奔趨分支則蕩滌沮洳取滋灌漑濬畝澮距川已耳至疏旁渠築圍埂俾旱澇有備高低鄉咸利則悉載在治田六事中率民力任之官為量助督率綱舉而目張一勞而永逸吾江南民從此得免魚鼈焉詎非仁人大惠哉日者梯航充發以下下之土田半天下之供奉而國不稱乏民不告病而公且屢上

蠲恤疏荷俞旨寬恤以蘇子遺公有大造于江南矣所  
著水利圖說為冊十六卷有詔令水源水道水年水官  
水議水疏水移治水治田水績水文終焉用以告夫將  
來官水者嗟夫治水猶醫治疾然圖說其方也視民饑  
溺由已而抱康濟實心猶醫活人心也方策具在醫國  
者執而用之以行其濟人利物之心要取經用于世間  
其所以康濟奕世者博矣底定弘勳將永賴之觀河流  
而思禹績公之明德遠矣哉他日游承簡渥由司空而

宅端揆以告成功錫玄圭豈得擅美於前乎則有太常  
金石之勒銘者在固予夙所首薦知公期公者也顯以  
俟之萬歷八年庚辰仲冬吉旦徐棡謹撰

欽定四庫全書

序

三吳水考序

夫水於化育居首焉五德之運亦惟時所勝故其迭尚亦因以建邇在昔五行之官治而世乃用乂及我明肇造東南我吳列郡皆為甸服固水地也川瀆敷污谷壑澤壤原隰則圖籍載焉若司空作治虞人掌水之禁以時行視令甲無不具其湟遂畝澮溝洫又農正所典司疏導有程水庸職焉詳哉法之善矣乃邇歲水勢所盪汨時有變遷故道多壅闕不治潦則成浸曠乃或無所

資廟議方軫國計屬有言者爰命臺臣護作則陶林公  
實來遂經度考咨履行詢謀凡水事罔不覽該其疏導  
乃自江以逮於海古謂三江震澤水之大者既迄治餘  
支渠無慮千百播為泖蕩湖瀆洚散溢於諸郡間壅者  
資灌既利水稻決者疏底滯去滔汨節宣其流方羊迅  
通者因以漕致負海之粟其在陵陸水所不及則磽瘠  
乃空引穿掘使洒濯焉越沙衍蕩為坵墟流乃細不任  
潮所沃益不能洩其淫則暴流倒注乃盡排治淘汰洗



滌之故高高下下咸若其性而土益作又水之去留皆  
為利斥瀉沮洳舊坊之湮夷井疆廢墮者蓋秩如矣貫  
輸交注雖有堯湯之水旱可以待諸乃北向獻功且最  
所考度稽謀始卒備成爰為書用垂之後其記別有十  
二蓋紀水之所發源次則所由經帶天之雨暘歲有愆  
則水之盈縮為利害水工之設有常秩而又有董率鎮  
撫之與所為治方畧乃水之順其性循下也自昔迄今  
其疏鑿之跡為農田利者爰逮所列上請事板下郡國

徵發因著為令有所損益因革者及下所逮畫荅教頌  
述功德者乃咸載之夫是役也自江以南則漢之丹陽  
會稽二郡地今之首京潤而連吳淞者也廣輪千里凡  
歷四年所躬跋涉道塗相度工之鉅且久財用未嘗賦  
於民而不至匱勞於役而詠歌作焉則侍御公亮誠體  
國懋規碩慮忠勤之効弘濟之才具著矣勒成一家言  
為百世憲章嗣後因而修之補緝護視可遵而行即史  
氏為河渠溝洫書當取之盡載公行事之詳一代社稷

功尚有徵哉萬曆辛巳春日長洲劉鳳撰



三吳水考序

三吳水考者柱下史闕中林公命諸文學所輯也書成  
諸文學持以示余展圖誦說歎曰此殆經國之宏猷垂  
世之彛憲也方今聖天子握符纘歷乘水而王履靈長  
之運值寧宴之時而四方頻以水患聞淮海逆流襄陵  
是虞漕河告決宣房未就林公首膺簡命奉璽書克治  
水使於江南當宁切儆予之憂攬轡恫猶已之溺周爰  
畿郡跋涉山川悉聽便宜多歷年所凡七載奏平成之

績迄漸被之聲暇準禹貢手輯是書一曰水源二曰水道次以水年又次以水官示之經畧列之膚功繫之水田水文終焉備矣司勳氏曰自大禹作貢史遷著為河渠孟堅演為溝洫邈矣桑經淵哉庾紀可綜而叅夫水非窮源何由測其濫觴之始而以濬以乂苟不循其故道或壅或塞未得其趨且入也不亟治之何由以宣以洩俾宅陂會同遵委輸也治水不田庶土安正匪上中下錯財賦罔登矣非董之以官職司其誰列以等則庶

可以為典要也紀之以年一張一弛因革昭焉可以稽  
時而景行也公又以身喻腹心腸胃血脉榮絡以至尾  
閭若指諸掌殆嘗藥之軒岐治生之盧扁也夫遡黃浦  
劉河臻於婁淞曰洋曰港地有高卑土有埆瘠湍有緩  
急源有淺深乃立之墟築之堤廢之塘過之壩閉之閘  
大為之防水咸潤下達於河入於海歸墟於壑偉哉功  
不與夏忠靖埒乎在昔肅皇帝之朝甲辰之歲侍御史  
為新昌呂公覩艱於昏墊興慨於澄清條陳五利上請

詔報曰可允乃施行逮今三紀餘矣復遇林公此往鑒也時蘇守為陽曲王道行氏采夏謨之州陂昉周官之藪浸蒐邾生之畧補單子之遺為三吳水利圖考屬余為序板置郡齊兩柱史之利民他日當廟食於三吳二編將並傳於永葉哉余皆側名其末良幸矣於是文學張子內蘊周子大韶持之以復於柱史萬曆壬午九秋既望吳郡百泉山人皇甫汈撰



三吳水考紀畧

水考者水必考而後明也東南水利以百川為支以震澤為滙以三江為襟帶以大海為宗以常鎮為上源以蘇松為下委要其利害之大端不過視水道之通塞而已書稱三江既入震澤底定言巨浸之委輸不壅而百川通流也百川之水滙於震澤震澤洩於三江三江入於大海蓄洩以時灌溉常足吾見水之為利而不為害也禹蹟既遠世代累遷疏鑿之政廢而

不講上流壅闕則下流橫溢一遇淫潦能不為蓄何也百川之水道不通則不能盡趨於震澤震澤之水口不導則不能盡洩於三江三江之咽喉復滯則不能盡入於大海而欲其不為蓄也得乎蓋大海之所以能納江湖百川之水者以其洩於尾閭如沃焦然故萬水歸之而不盈也震澤雖巨容納百川苟不得三江以洩之於大海而欲總三吳之水積之震澤勢必不能內不得洩外必不復能受則不惟震澤之溢

能使平陸成川而一渠一瀆之水皆足以為蓄矣故  
疏濬之政不可不講也唐宋無論即如我明三吳之  
興水利者前有夏忠靖原吉後有周文襄忱其所建  
立宏偉非不為三吳永利而水道靡常積歲既久不  
無湮塞至我皇上軫念東南俯采末議諮諏經畫排  
決疏導蓋始於萬厯之五年至十年而後工竣爰集  
水考一書以告成事執權秉憲非命不尊故先之以  
詔令河洛呈祥會稽制貢厥有圖書乃能考究故繼

之以圖說岷山桐栢崑崙崙嶓冢莫不有源不窮其源  
曷泝其流故次水源血脉和暢然後榮衛敷腴川澤  
通流然後灌溉獲利故次水道天道玄邈蓄祥時有  
知而謹之人事足貴故次水年得失殊狀利害相參  
則有三老長年可採而用用固不臧故次水議人臣  
之義以尊主安民境外雖專而有不可以不稟令者  
非疏不達故次奏疏官有專職斯事有考成自大禹  
為司空代不乏人諸所豎立往往垂之史冊照耀來

茲故次水官事貴初謀民難慮始宣揚德意以告有  
衆以東庶官則文具不可缺也故次公移天下之事  
未有不先經畫而能底績者上以權肅令下以令趨  
事上下之間如指臂然故次水政司空作治虞人掌  
水三江九河疏導有程畝澮溝洫潴瀦有制手足胼  
胝世乃用又故次治水凡志士勞臣之所為日夕兢  
兢不遑啟處以興水利者罔非為田工也治水而不  
治田水將曷利故次治田以告成事以開後人是不

可無紀也若施伐足為引嫌則禹貢可以無作故次  
水績水利聿興將以永利非見之文字不傳非託之  
金石不固故次水碑終焉後之欲求三吳之手鏡者  
觀於此書則幾矣

欽定四庫全書

三吳水考卷一

明張內蘊周大韶撰

詔令

小序

水利先詔令者一以宣天子之德意一以重臣子  
之事權奏功集事恒必因之主上尊居九五而神  
運萬方身在穆清而慮周田野其於水利之廢興  
生民之利病譬如捧大明以燭幽遐所在洞然明

了故命官專督畀以一方生靈之寄惟恐後時而必重其事權錫以璽書所以計安元元者至切也人臣而膺茲簡命命專則人思殫精權重則事無掣肘而疏鑿底定之政可次第舉行以延訪盡人情以講求合機宜以舉刺肅諸司以賞罰勸工役百爾有衆所以雲蒸風動而踴躍奔走畚鍤之下者惟此以鼓舞之此水利之所以先詔令也

太祖高皇帝為吳國公時以康茂才為營田使諭之曰



比因兵亂隄防頽圯民廢耕耨故設營田司以修築  
隄防專掌水利今軍務日殷用度為急理財之道莫  
先於農事故命爾此職分巡各處俾高無患乾卑不  
病潦務在蓄洩得宜大抵設官為民非以病民若但  
使有司增飾館舍迎送奔走所至紛擾無益於民而  
反害之則非付托之意

宣德五年勅諭工部右侍郎周忱今命爾往南京應天  
蘇州松江常州鎮江太平寧國池州徽州安慶廣德

州巡撫遞年一應稅糧務在從長設法區畫得宜使  
人不勞困輸不後期尤在敷宣德意撫恤人民扶植  
良善其水田圩岸爾亦相度時宜整理俾無旱潦之  
患庶副朕委任之重欽哉故諭

正統九年勅諭工部右侍郎周忱近聞浙江嘉湖等府  
直隸蘇州等府地方今秋多雨潦水暴溢滄沒田稼  
漂蕩民居溺死人畜蓋因各處遞年將舊通江海河  
港乘乾旱之時築塞為田耕種及因遞年沙漲以致

水不流通人受其患今特命爾會同巡按御史嚴督各該府縣拘集耆民里老人等詢訪踏勘各處原通江海河港故道果被豪強之人築塞為田即令退還并年深淤塞之處爾等公同計議督令府縣官起倩人夫開挑務要水道通行不至為患其餘湖池陂塘圩岸可以蓄洩水利防備旱潦者悉從宜修築開通其間果有豪強之徒占據把持以為已利者爾即挈問輕則量情懲治情重者具奏區處用工之際尤須

相度地勢酌量民力其殷富田多之家務令儘力用  
工貧難下戶及田少糧重者酌量差遣不可誤其生  
理如其工程浩大人力艱難非旬月可成者爾宜審  
度用工宜令受利近便去處同心用力切不可妨廢  
農時朕惟豪強專利小民受害論法難容今姑宥其  
罪使之自新保其身家爾為朝廷重臣宜表率同事  
公以存心廉以律身勤以從事必誠必信用圖久遠  
毋虛勞民力毋苟具文移以塞責毋狃於小利以為

功爾克盡職民受實惠朕惟爾嘉朝廷以安養斯民  
為念宜深體朕心為民造福以副任使或有窒礙難  
行之事亦須體諒人情從長計議奏來不許違誤故  
諭

嘉靖中勅諭巡撫都御史歐陽必進曰朕惟國家財賦  
取給東南近該前巡撫都御史丁汝夔及巡按呂光  
洵各題稱蘇松常鎮四府地方連年水旱頻仍皆由  
水利湮廢以致民困賦逋貽患非細乞要查舊例通

行修濬事下該部轉行彼處查勘得太倉州常熟崑山等縣七浦白茆新涇等河港鹽鐵許浦等塘堰修濬有官民併力合修者其所費財用有原派導河夫及存留各項銀米并撫按司府州縣贓罰與夫應解錢糧堪以那借者俱令支用已經該部議奏前來相應依擬爾見有地方巡撫之責特命專理其事爾宜查照節題事理及巡按委官勘處緣由將四府支河幹河動支前項銀米查議原奏官民合修分修地方

坐委能幹官員責令及時修理庶幾事克有濟爾仍  
照先年撫臣李充嗣事例不時躬往督視務使緩急  
有備旱澇無虞期於一勞而永逸各該承委官員除  
巡按御史每年閱視工程分別勤惰舉劾外如有違  
慢悞事者五品以下爾即徑自拏問應奏請者奏聞  
施行事完之日通將修濬過緣由畫圖貼說并用過  
錢糧數目造冊奏繳及將勤幹賢能官員通行論奏  
以憑旌擢

隆慶六年七月二十八日詔書內一款大江南北財賦所出全資水利各處設有水利僉事各府州縣設有水利通判縣丞等官近來往往視為末務上下因循一遇水荒即奏乞蠲免賑濟引天災以逃責豈為民父母之道今後各該撫按督令專管水利司道官往來巡歷着落有司官將該管地方水利着實講求議處何處當疏通其源何處當挑濬其流壩堰圩岸在在增修使蓄洩有備旱潦無傷合用夫役取諸得利



之家毋令騷擾若功程浩大撫按官查其先年導河夫役用剩貯庫及該府州縣近地魚課奏留修理隄壩等銀兩酌量動支有司官有仍前曠職誤事及地方土豪之家阻撓壅塞專利病民者撫按官參挈處治

萬曆四年勅諭監察御史林應訓近因言官建議蘇松常鎮等處水利久湮要差御史一員專管該部議覆相應今特命爾督理前項地方水利務要時常往來

巡察督率各該司道及府州縣掌印官責令水利官帶同塘長人等躬親相度考究源委要見某處係上游水滙某處係下流支港應分某水以殺其勢應濶某岸以緩其衝應濬某湖以會其流某處壩閘應修某處塘堰應築合用人工隨宜區處其劉家河黃浦七浦白茆范家浜大黃浦及各鄉支河尤當分疏其餘緊要河港湖滙并浙直交界所如有未經開通及已開仍欠深闊與夫塘堰涇瀆陡門閘壩等項應修

應濬應復舊應新置者通勘估議處如一圩之中塘岸溝池等項不煩多費者即令得業之家量田多寡出力修濬果係土工浩大動支淘河等銀應用如再不敷會同撫按官從長計議務求共濟各不得推諉其該道并府州縣掌印等官敢有怠玩誤事及水利官營求別差隳廢職業或需索常例利已病民應挈應參並聽舉行如例若勢豪之家侵塞水利姑令首正免罪敢有隱瞞及違拒阻撓者即行拏問干礙職

官指名叅奏每年終將修濬過緣由造冊奏繳復命  
之日仍將所屬大小官曾否有益水利照例舉劾以  
昭勸懲爾為憲臣受茲重委須夙夜殫心務裨水利  
興舉旱澇有備以為益國便民之計如或因循苟且  
虛應故事責有所歸爾其欽承之故勅

三吳水考卷一

欽定四庫全書

三吳水考卷二

明張內蘊周大韶撰

水利大綱

太湖

太湖在蘇州西南三十里迴連姑蘇湖常三郡越絕書  
曰其大三萬六千頃東西二百里南北百二十里禹  
貢謂之震澤周禮爾雅謂之具區左傳越入吳吳子

樂之笠澤亦名笠澤又太湖上稟咸池五車之氣水  
通五道又名五湖今湖中亦有五自莫釐之東與徐  
侯山相值者為菱湖莫釐西北與菱湖連者為莫湖  
連莫湖東逼胥山者為胥湖長山之東曰游湖長山  
西北連無錫老岸曰貢湖別有金鼎湖梅梁湖東臯  
里湖而吳人通稱則曰太湖其上流西北有荆溪百  
瀆受建康常潤諸郡之水西南有苕霅二溪七十二  
瀆受宣歙臨安杭湖諸山溪之水諸水自西南北總

匯於太湖獨以湖東三江委流於海夫其來源既猥  
盛而江道復填淤此三吳所以歲苦水也乃若多穿  
支渠使上源有所節殺濬復三江使下流有所洩宣  
專司守牧者當未雨而綢繆矣

### 三江

三江者吳淞江婁江東江也酈善長曰松江自湖東北  
逕七十里至江水分流處謂之三江口而吳地記亦  
曰松江東北行七十里得三江口東北入海為婁江

東南入海為東江并松江為三按今三江一自太湖  
從吳縣鮎魚口北入運河經郡城婁門東流入上下  
雉瀆抵崑山至和塘東合新洋江經太倉塘合劉家  
港入海者為婁江一自太湖從吳江縣長橋東北合  
龐山湖入長洲界過大姚浦抵崑山界分為二南為  
吳淞江北為勦娘江復合為一東流入嘉定界經上  
海合黃浦東入海者為吳淞江一自白蜆江從急水  
港過澱山湖東至華亭合上海黃浦由黃浦經上海



宋家港合吳淞江北入海者為東江太湖洩水川渠  
非一而三江為大三江並洩湖水而吳淞為徑唐宋  
而下治水使首務焉然時湮時濬害未甚也往夏駕  
新洋之役并引湖水由婁江入海稍稱利便不知婁  
江之流既駛吳淞之勢漸微以故諸境之水吞多洩  
少迄後歲苦稽天矣隆慶時大中丞嶺南海公下開  
復之議經費大具未竣而代百姓所為嗷嗷有以也  
萬曆六年特疏其狀詔命大發人徒開濬約四十里

有奇諸分水支渠無慮千百俱附三江入海震澤底  
定復禹蹟之舊云

海

海為天地之巨浸而江流入焉三吳之海則東北起江  
陰之戊子門大江入海處南抵海寧縣錢塘江之入  
海處凡四百八十里海水時常橫溢濱海居民往往  
罹害故大海不可無捍海塘猶太湖之不可無三江  
也因並列之

捍海塘

捍海塘唐開元元年築西南起杭州鹽官東北抵松江  
老鶴嘴長四百餘里高一丈七尺面濶二丈址倍之  
由宋及元屢毀屢修入國朝而後故趾盡塌矣成化  
中大中丞畢公亨侍御鄭公銘僉憲吳公瑄會檄松  
江太守白公中行遷築內地二里許凡六旬而竣起  
海鹽抵上海延袤三萬四千七百六十九丈又為外  
隄起戚滌抵平湖界為里五十有三今諸境便利焉

夫太湖之不可無三江猶濱海之不可無捍海塘也  
因附著其事

運河

運河一名邗溝隋煬帝大業六年所穿江南渠也起杭  
州侯潮門北行經武林從雙橋入崇德縣境經縣治  
折北而東過嘉興府城濠又折而迤北會頓塘鶯脰  
湖諸水東出平望鎮湖州府運船由之運河又北經  
九里石塘遶吳江縣而北松江運道由白蚬江西來

出呼鯉涇與運河合入長洲界又北經姑蘇城與至  
和塘運河相合崑山嘉定太倉三處漕運由之蘇城  
之北為元和塘常熟運船由之俱會於永安橋以出  
楓橋運河由許墅關北行入無錫界經縣治而北抵  
五瀉河口與江陰運道相會又西北經常州府城而  
西為西蠡河與宜興溧陽之運船相會截白鶴溪折  
北而為孟瀆河口運舟開時遇夾岡淺阻或北舟南  
還京口閉築由此河出江而渡接揚州白塔河此江

南之間道也運河越孟瀆口而西行為奔牛閘又十里而為呂城閘呂城之西為珥瀆河金壇縣運船由此出會于運河又西北入丹陽境貫城而西北抵夾岡入潤州境舊為夾岡隔絕江流不通舟楫煬帝鑿夾岡通之今兩崖壁立故善崩潰經鎮江北出京口閘總為里七百二十有奇江南運舟由此渡江入瓜州閘抵淮而上京師東南要津也顧其渠本人力開通又城闔關市互夾民居易於堙礫隆慶中河臣建

議歲運冬開避黃淮之險而北舟南兌且乘秋漲之便號為兩利不知歲當沍寒川瀆方枯所在虞淺舳艫不御轉掠民舟且役排夫沿洄助挽蓋水陸兩困矣萬厯六年疏請大挑創復閘壩俾水有蓄洩漕乃通利

天關

運河總浙直七府漕糧軍民二運舳艫萬艘首尾相接必出閘外方可起桅停泊江中等風北渡卒遇怒濤

漕舟破壞歲歲有之公私受害者久矣近於萬厯六年閱視夾岡河工始知由於丹徒鎮江石橋阻阨故運船不能起桅出江所致也乃於丹陽以北凡有石橋俱易木頂改為天關可便抽拽運船一過丹陽距江百里即豎大桅有風便渡直抵京城設或無風俱得停泊於運河內地等候順風始免險阻之患雖北船南還兌運進閘之後次第卸桅頗稱便利焉

閘科



閘之為義押也視水盈縮為節宣也斗之為義斗也所以量水出入無過行也故常鎮二府建閘蓄水本欲以濟運河然回南糧船官民取道恒必由之以致洩多蓄少每艱運期今本院開孟瀆以通間道於南疏九曲鐵猫以分行於北中修練湖堤閘又儲水以兼濟焉則閘之啟閉有常利茲博矣江陰舊有斗門積廢已久今本院於其廢者復之圯者修之故高鄉局斗以獲灌溉之資低鄉啟斗以慎蓄洩之利閘斗之

為義如此司牧者其毋畧諸



# 三吳水利總圖





三吳水考

三吳地形在浙惟杭州為最高湖州次之嘉興又次之在直隸惟鎮江為最高常州次之無錫又次之太湖當浙直之下流蘇松又居太湖之下流故山源奔注自高而卑若鎮常若建康若杭嘉湖凡趨於湖者皆源也若蘇若松凡通其流於海者皆委也源莫大於天目委莫大於三江備列之圖以俟司水者考焉

三吳水利圖說

江南水利譬之人身天目首也諸山溪口也雨澤飲食也太湖其胷腹三江其腸胃海其尾閭也考諸誌載黃浦即東江之別名劉河即婁江之舊跡并吳淞為三江吳淞西連太湖東通大海江流迅駛唐以前吳中未聞有水患迨後吳江長堤一築而腸胃始失其利國初水患轉亟而夏忠靖公乃專力於夏駕新洋一時大有所裨其後新洋江水勢湍悍日就深濶而

吳淞江之氣脉漸微矣土人以此稱為漫水港云夫江流紆緩既無以蕩滌潮沙而新洋夏駕倒注之潮復與東來之潮相會合則停停則淤江之旋開旋塞有由然也本職恪遵廟算廣集衆思咨訪機宜究極形勢乃知水之併溢為災由於源之未節江之並行而至於相奪則以流之未得所歸也於是闢治江中壅塞四十餘里以復吳淞之故道決去吳江灘漲數十處使太湖積水直注於吳淞濬松之山涇等港



秀州官紹鹽鐵蒲匯六磊等塘洩澱泖諸湖之水於  
黃浦濬蘇之吳塘顧浦戚虞涇南北橫澀等處洩寬  
嘉太倉諸水於劉河復濬七浦楊林等塘使陽城巴  
城諸湖之水徑入於海濬白茆福山三文諸浦九里  
青暘山塘雷港等河使尚昆湖毘陵晉陵諸水徑入  
於江皆所以導其流也濬白鶴溪荆城港西九里河  
洩長蕩荆溪諸水入於運河濬武進之孟瀆丹陽之  
九曲河丹徒之鐵猫港洩潤州上流之水亦入大江

皆所以節其源也源流各得其所然後於千墩浦南  
濬澱山湖口使湖水通徹入於吳淞又慮江水外逸  
乃於夏駕及漫水江口並建一閘隨時啟閉庶幾水  
不外趨潮不倒注吳淞可保無虞若夫練湖修復則  
儲水以備運道經理之方大要如此至於濬支渠築  
圍埂各有民力自任法具治田六事中第須官為督  
率歲歲舉行俾吳之田圍恒固河道恒深旱澇各有  
其備則在後之繼今者和衷協濟相維持於弗壞焉耳

三吳水利考

吳地古稱澤國襟江帶湖延控大海萬水所湊觸地成川是故吳於天下郡國最為卑下古今治水者莫先焉禹貢曰淮海維揚州三江既入震澤底定周禮職方氏揚州其澤藪曰具區其川曰三江其浸曰五湖東南州郡皆古吳地揚州域也而三江五湖皆在今蘇州境故蘇州於吳地又最為卑下古今治水者莫先焉太湖為東南巨浸周五百餘里在蘇州西南境

五十里連蘇湖常三州之地可謂大矣東達於三江以入海三江通則太湖之水不為害太湖之水不為害則蘇常湖三州皆安而蘇州尤被其利三江不通則太湖東注汜濫為災常湖之境未為患而蘇已先受其害矣何也蓋常湖據其上流地常高於湖而蘇州則居下流稍有壅闕境內皆成巨浸矣故治水東南蘇州為急蘇州屬邑有七而吳江居其東南下流為淞江入海之發源崑山居其東北為淞江入海之

要道稍有壅闕二縣之境皆成巨浸矣故治水於蘇  
二縣為急然吳江之地左江右湖極為低窪是當水  
之都會也崑山之地引江達海扼阻諸邑是當水之  
關鍵也故治水於二縣其先後同而崑山為尤急也  
太倉嘉定則濱海高原十居八九憂旱而不憂潦宜  
蓄而不宜泄其治水之法亦有相因而不為背者邠  
亶所謂辨高下之原求蓄泄之跡者此也然東南之  
地雖間有高原而終為澤國江海所歸水未嘗乏絕

故自古及今皆詳於治水而畧於治旱以旱不能為大患也吳縣處郡之西偏南屬震澤旁皆山田高視太倉嘉定而長洲常熟之地與崑山吳江連界者則視崑山吳江其西北與常州之江陰連界東南與太倉連界者亦視太倉江陰宋趙霖所謂平江之田雖下於諸縣而瀕海之地特高於他處謂之垵身垵身之西又與常州地形相等東西與北三面勢若盤盂積水南入注乎其中所以沿海環江開治浦港不可

不先者也。大率諸縣地勢有高有卑，治水之法有同有異，豈可一概取必乎？竊嘗考之古今治水之蹟矣。吳地自大禹通渠三江五湖之後，歷夏殷周二千餘年，未有能繼大禹之蹟者。故治水之法不見於經傳。國語夫差起師北征，闢為深溝，通於齊魯之間。即今運河南自嘉興，由石塘北流，經郡城北，遶白公堤，出望亭，入無錫縣界。續圖經所謂邗溝者，此也是。亦不過疏之以通征伐耳。未聞其為民利計也。漢初為藩

封之地史稱吳王濞即山鑄錢擅山海之利富埒天子而亦不聞其以水利耕植也孝武時太史司馬遷北發姑蘇望五湖遊覽形勝思禹之功其意深矣三國吳孫權據有江東遂以富强以逮魏晉之際皆為股肱郡縣然亦未聞治水興利之事或紀載之闕未可知也至劉宋元嘉中揚州刺史始興王濬以松江滬瀆不通欲從武康紆溪直出海口穿渠洽功竟不立梁大通中吳郡水災詔遣前交州刺史王奕假節



發中吳吳興信義三郡人丁漕大瀆以瀉浙江信義  
郡即蘇州也時崑山為信義縣水利之說於是興矣  
唐貞元元和間于頔王仲舒刺蘇州皆有興修之舉  
而唯有宋為詳且備王荆公議廢都水監不便謂議  
者曰舉天下之役其半在於河渠堤埽此可見矣天  
禧間江淮發運副使張綸同郡守經度於崑山常熟  
疏五湖導太湖入海復歲租六十萬斛乾興元年詔  
蘇湖秀州積水害稼發鄰郡兵疏導以決其壅天聖

初蘇州水壞太湖外塘又海旁支渠堙塞廢民耕田  
詔轉運使徐奭等董其事勅入內供奉官張永和相  
度市涇以北赤門以南築石堤九十里起橋四十餘  
所濬積潦自吳江東赴海復良田數千頃流民得自  
占者二萬六千家歲出租苗三十萬景祐初范仲淹  
守鄉郡議疏導諸邑之水上書宰臣具言水利寶元  
元年葉清臣為兩浙轉運副使以並太湖有民田豪  
右據上游水不得泄世為民患遂請鑿盤龍滙及滬

瀆入海民賴其利自是以後慶厯中常熟開金涇鶴  
瀆二浦溉田千頃吳江修荻塘以通湖州至和中崑  
山開塘七十里名至和塘嘉祐中開崑山顧浦開松  
江白鶴滙如盤龍滙之法皆為民利熙寧三年郊亶  
言蘇州水利首論六失六得及治田利害七事至為  
詳悉事幾行而罷崇寧二年宗正丞徐確考禹貢三  
江之說以為太湖東注於海松江正在下流請自封  
家渡古江開洶至大通浦直徹海口七十餘里水道

大通政和間趙霖體究治水利害具有三說一曰開  
治港浦二曰置閘起閉三曰築圩畧田興修未及一  
二而罷隆興間李結獻治田三議一曰敦本二曰協  
力三曰因時其他開治淤塞歷淳熙嘉定紹定之間  
皆為民利至前元大德八年開吳淞江任仁發有水  
利議答泰定至正年間屢濬江海然比於有宋則為  
甚畧矣潘應武言決放湖水吳執中言順導水勢周  
文英言三吳水利皆有經畫未知當時施行若何也

國朝洪武九年開濬白茆至和塘及諸涇港永樂二  
年命戶部尚書夏忠靖公原吉疏治蘇松水患自後  
巡撫侍郎周文襄公忱巡撫都御史崔公恭皆濬治  
吳淞江以興水利成化八年置僉事於浙江專治蘇  
松等府水利十年都御史畢公亨知府丘霽復修崔  
公之功至弘治間連被大水命工部侍郎徐公貫疏  
江湖涇浦而水有所歸九年工部主事姚文灝開七  
鴉浦築沙湖堤且疏言六事皆中機宜告諭數條悉

明利害其所編築圩歌至今鄉村之民家傳人誦焉  
十一年工部郎中傅潮奉勅理吳中水利濬治崑山  
十河十五年郎中臧麟繼之皆有成績正德四五年  
蘇松大水為災民不粒食時都御史俞諫奉勅治水  
踰年而工息復差工部郎中朱袞治水吳中並為民  
利今上御極憫東南數被水患恐重傷財賦之地乃  
命巡撫工部尚書李公克嗣興修水利時官屬若郎  
中林文沛員外郎顏如環實分理其任顏治吳淞江

林治白茆未幾，顏以憂去。林遂併治二水。時李公建行臺於太倉，總督於上，而林則周行諸邑，躬親相度。導白茆瀆，吳淞江疏太湖於夏駕浦口，置閘以障渾潮。其他堤堰陂塘之修築者甚衆，一時措置周悉，號令嚴明，厥工告成，利被吳下。迄今十餘年，沿江濱海，其要害通泄之所，所宜及時興修以防未然，正有賴於今日也。





三吳水利考序說

禹貢揚州之域自江以南其郡以十數蘇州松江常州  
鎮江四郡最大於地為吳分其部所領凡一州十有  
七縣縣地千里畛畷無數自漢唐以來號稱財賦疆  
予嘗按圖書在虞夏之貢以為下田然亦靡有象犀  
珠玉丹砂金碧山林之饒而財豐若此者豈有他哉  
蓋其民重稼穡專務水利故也夫水利之大莫過於  
江海今自蘇州以北至常州鎮江東至松江皆壤地

相屬襟帶江海而又有太湖為之灌注漢司馬遷以  
為吳東有三江五湖之利有由來矣三江即松江東  
江婁江也五湖即太湖中小湖有菱湖莫湖胥湖游  
湖貢湖凡五名故曰五湖其實一太湖也蘇州在太  
湖東北三江五湖皆屬焉三江五湖之外若湖灑蕩  
漾滄瀆塘浦名聞者以百數醜而為渠行水溉田者  
其交絡之流又無所不至是以蘇州地雖卑下為衆  
水所鍾而田因貯淤肥美多為沃壤今量其賦獨為

諸郡最松江之水不能半於蘇州其名聞者亦以十數澱湖三泖最大皆西受太湖之水醜而為渠者以百數黃浦最大皆西受澱湖三泖之水浦之始楚春申君黃歇之所為也今諸鄉之水溉田者皆由此浦世賴其利唯東北瀕海墘身之田浦水所不及者往往多廢故松江之賦視蘇州十居其五常州之水其最大者有滬湖洮湖濠湖閭江沈溪荆溪百瀆諸水雖滴滴分流或北屬於大江南屬於太湖然其地居

太湖上流多高原易寘淤為害故其賦又視松江為  
下鎮江地勢至北益高去太湖頗回遠無所通唯漕  
渠自嘉興歷蘇州常州直北流入界中抵京口通江  
淮耳然渠自京口經夾岡勢繚曲皆鑿山為之而豬  
水少宋元祐中于京口呂城下捷石為渠兩涯置牖  
以禁障內外之水時其鍾泄而又與鎮之練湖相宣  
通練湖方四十餘里晉陳敏據江東過馬林溪為之  
以溉雲陽今並有益于渠田湖視新豐杜墅長蕩諸

湖最大而水淺亦易索大抵鎮江地皆瀕山鮮平土  
水往往循行岬隙間故其田多瘠塉而賦獨在諸郡  
之下夫蘇州通水多故其賦獨為最鎮江通水少故  
其賦獨為下此水之為利於四郡較然也然水本以  
為利自水道淤闕比年以來旱澇洊臻如此四郡數  
逢其害民人流散死喪相踵深可痛惜而其財賦所  
出與所糴亦異若究所由豈非為有司者慮害不深  
重惜繁費不專務水利之故哉方今四郡財賦歲輸

于京師者往往當天下之半其為有益于朝廷甚大其所宜軫念又非他郡之比今水道淤闕為害滋久而不早為之所吾恐民日益困財日益匱賦將安出甚非所以為國家久遠長善之慮且今量其費不及一郡一歲所輸三分之一其勞又非有鑿龍門闢伊闕析砥柱之艱危其遠又不過五六歲而即有以建數百歲安富之美功未聞事省而能收大利有如此者如此而又不亟為之是謂棄天之時遺地之利竭

人之財莫此為甚夫宜知山川與民所疾苦國之利害皆有官守者之任故余既考跡志記綜覈舊聞博議深論以相問難及利害既明是非亦定于是乃推表四郡及其所部州縣輯為圖考條其川原預定計算綴集遺文以為一書庶國之利害皆有實徵而可行焉





太湖考

太湖在蘇州西南境三十餘里禹貢謂之震澤周官爾雅謂之具區國語史記謂之五湖左傳謂之笠澤揚州記曰太湖一名震澤一名笠澤一名洞庭山海經曰浮玉之山北望具區是也周官既云其澤藪曰具區又云其浸五湖似五湖別有所在然范蠡乘舟入五湖司馬遷登姑蘇望五湖實又指此且揚州之境水大者無過於太湖其為具區甚明而歷考傳記所

載五湖卽是太湖非別有五湖也張勃吳錄曰五湖者太湖之別名以其周行五百餘里故以五湖為名虞翻曰太湖東通長洲松江南通烏程雲溪西通義興荆溪北通晉陵馮湖東連嘉興非溪水通五道謂之五湖陸魯望曰太湖上稟咸池五車之氣故一水五名圖經以貢湖游湖胥湖梅梁湖金鼎湖為五韋昭以胥湖蠡湖洮湖馮湖并太湖為五郭璞江賦以具區洮滬彭蠡青草洞庭為五初學記云或說以射

湖貢湖上湖長塘湖漏湖為五按左傳越伐吳吳子  
禦之笠澤國語吳越戰於五湖可見五湖之為一湖  
甚明也然今湖中亦自有五名曰菱湖在莫釐之東  
周三十餘里曰莫湖在莫釐之西北周五十餘里曰  
游湖在長山之東周五十餘里曰貢湖沿無錫老岸  
周一百九十里曰胥湖在胥山之西南周六十里五  
湖之外又有三小湖夫椒山東曰梅梁湖杜圻之西  
魚查之東曰金鼎湖林屋之東曰東臯里湖而吳人

稱謂則總曰太湖越絕書稱其大週三萬六千頃連蘇常湖三州之地湖中有七十二山其大者曰東西二洞庭馬跡次之山居人甚多閭巷并舍鱗次蟻聚無慮數千家而仙宮梵宇分布上下茂林平野彌望百里可謂大矣然考之太湖上流其西北自建康等處入溧陽邗迤至長塘湖并潤州金壇延陵丹陽諸水會於宜興荆溪以入其西南自宣歙池州武林天目富陽下湖之安吉武康烏程長興合苕霅山溪諸

水以入數郡之水瀦滙於湖汪洋濬漸不可涯矣而東達於三江以入海東南積水之區蓋莫有大於此者其底定也則灌溉民田為三吳美利汎溢也則浸淫數郡而民被其大害是以古人之治之也疏其源使水有所入導其流使水有所歸皆為民興利除害而已故觀其置五堰於溧陽以節宣歙金陵九陽江之水使入於蕪湖以北入於大江開夾葶干於宜興武進之境東抵滬湖北接長塘湖西連五堰所以洩

長塘湖之水以入涸湖泄涸湖之水以入大吳瀆塘口瀆白魚灣高梅瀆白鶴溪而入常州運河之北偏十四斗門北下江陰之大江所以殺西來之水使不入於太湖而皆歸於江也又以荆溪不能當西來衆流奔注之勢遂於震澤之口疏為百派謂之百瀆而又開橫塘以貫之約四十餘里百瀆在宜興者七十有四在武進者二十有六皆西接荆溪而東通震澤者也又於烏程長興之間開七十二漚在烏程者三

十有八在長興者三十有四皆自七十二漚通經通  
脉以殺其奔衝之勢而歸於太湖也太湖上流諸道  
水之來源若此而所以洩之者則惟於三江是賴焉  
太湖東出吳江縣之長橋為吳淞江由吳淞江東流  
以入大海此震澤洩水之大道也然洩水之處各有  
區域蓋不止於吳淞江而已曰鮎魚口曰胥口曰白  
洋灣曰管瀆曰小溪港曰瓜涇曰夾浦曰張家河曰  
北車橋曰漾湖溪曰上瀆港曰陸家浜曰虎山橋曰

石家浜曰南宮曰蒯家涇曰九曲江曰後塘橋曰梅梁溪曰龍塘河曰迎城山曰菱湖港曰太平橋曰澤塘浜曰灌瀆浜曰和尚浜曰長洛浜曰王家漾曰山涇港曰渡水港曰黃瀆港曰後保河其他支流尚多不可殫記皆所以洩太湖之水以東入於三江諸浦而歸大海者也然以江湖形勢觀之大要宣溧以上西北之水可使入於蕪湖以歸大江而不可使注於荆溪蘇常以下東南之水可使趨於吳淞江歸大海



而不可使積於震澤此治水東南之大旨也然地形  
有高下時世有古今水道有通塞而所以治之之法  
則固不可同年而語也



應天府屬水源

破岡瀆在句容中道至丹陽城西凡十四埭上七埭入延陵下七埭入江寧界吳赤烏間開運通京江晉宋齊因之梁廢此開上容瀆至陳上容瀆湮復修破岡瀆隋平陳遂廢

官塘河在縣東五十里北流入丹徒界

新河在縣東四十里源出駒驪山流入洮湖以入太湖  
絳巖湖在絳巖山下周百二十里界上元江寧二縣

石白湖在金陵城南二十里廣九十里界溧水高淳當塗三縣內有軍山塔子馬頭雀壘四山

丹陽湖在石白湖南廣六十里與溧水高淳太平寧國共界

固城湖在丹陽湖東廣四十里界高淳當塗宣城三縣銀林河在高淳縣東三十里西通固城湖東通溧陽之昇平湖長五十餘里即伍子胥所開運河以通伐楚餉道者又名胥溪內有廣通壩原隸溧水弘治中割

溧水置高淳今屬焉

按諸湖連亘幾二百里汪洋浩汗據三吳上游國  
初溧民陳嵩九疏請於廣通鎮築壩捍禦高皇帝  
下其議命兩臺督成之永樂四年改築  
土壩置官夫防守著為甲令今利賴焉

昇平湖在溧陽西南七十里水源自高淳諸山溪東流  
入湖會建平梅渚社渚入三塔等湖

三塔湖一名梁城湖周四十里西南接昇平湖北入永

陽等江

韓城港

在縣西南  
六十五里

藍溪

在縣西南  
六十里

流

水澗

在縣  
西南

了枝港

在溧陽縣  
西七十里

滄溪

在縣西六十  
里源出荆山

流經谷山  
入三塔湖

馬螳蕩  
在縣西  
東塘

强步滄  
在縣西  
五十里

東

塘港  
在縣西  
五十里

五堰去溧陽縣西五十里自廣通而東十五里曰新壩  
自此而東九里曰昇平堰又南九里曰三塔湖堰又  
東九里曰南渡堰又東九里曰沙漲堰又東九里曰  
前麻堰皆在廣通壩之東

單鏐曰五堰水利昔錢舍人公輔為守金陵常究五  
堰之利雖知五堰之水利而未知五堰以東之利害  
鏐知三州之水利而未究五堰以西之利害一日錢  
公輔以世之所謂五堰之利害與鏐叅究方知始末

利害之議完也公輔以為五堰者自春秋時吳王闔閭用伍子胥之謀伐楚始創此河以為漕運春冬可載二百石舟而東則通太湖西則入長江自後相傳未始有廢至李氏時亦常通運而制牛於堰上挽拽船筏於固城湖之側又常設鹽官置廨宇以收往來之稅是時河道淤塞堰埭低狹虛務添置者十有一堰往來舟筏莫能通行而水勢遂不復西及遇春夏大水江湖泛漲則圜頭王母龍潭三澗合為一道而奔衝東來河之不治愈可見也今若開深故道而存留銀林分水二堰則諸堰盡可去矣所欲存二堰者蓋本處地勢自銀林堰以西地形從東迤邐西下自分水堰以東地形從西迤邐東下而其河自西壩至東壩十六里有餘開洶之際須隨逐處地形之高下以濬之然後江東兩浙可無大水之患然銀林堰南則通建平廣德北則通溧水江寧又當增修高廣以俟商旅舟船往還之多可以置官收稅如前之利此

五堰所以不可不復也。今莫若治五堰使上之水不入於荆溪而由分水銀林二堰直歸太平之蕪湖。下至吳江之岸為千橋使太湖之水東入于海中。治百瀆之故道與夫蘇常湖三州之有故道旁穿於太湖者雖不可縷舉而槩可以迹究也。難者曰：雖復五堰奈五堰之側山水東下何？復堰無益也。鶚荅曰：由五堰而東注太湖則有宣歙池廣德溧水之水苟復五堰使上之水不入於荆溪自餘山澗之水寧有幾耶？比之未復十須殺其六七耳。難者乃服。

按五堰故跡廢久莫考。所據廣通壩東去五十里有昇平湖三塔湖又二十里有南渡滄沙張滄質之五堰之名不少異。則宋之五堰當在此諸湖滄之口無疑矣。蓋昔之五堰節溧陽諸湖滄之水由子胥伐楚運河盡入大江。今東壩乃在子胥伐楚運河內。則是止能節固城湖以西之水入江。非能



并溧陽諸湖滄之水而盡節之也然廣通地形頗高今之二壩亦自足以節水則亦不必過求古跡矣

舊縣

在縣西四十五里水自分界山經上興埠東流流至南渡滄

南渡滄

在縣西四十里自建平高淳并南境諸水盡會于此分注兩江

李家渡港

在縣西三十里上通湖瀆橋洩黃山湖水

湖瀆

在縣西三十里通黃山湖水

淦西港

在縣西十二里

金花蕩

在縣

西二十里通淦西

新昌滄

在縣西二十里

葛涪滄

在縣西十五里西連新昌

滄

毛家滄

在縣西十三里

鹽港

在縣西七里上通南渡滄下經泓口通崑崙揚

卷

永陽江一名水陽江又名九陽江

在溧陽西北四十里源出曹老山東南流

入江東北入於洮湖

謝達滄

在縣西北四十里

瀨陽滄

在縣西北三十六里

俗呼瀨溪上接三塔等湖東入洮湖

諸陽滄

在溧陽北四十里

馬墅港

在縣

北三十里

涇瀆

在縣北三十里金壇溧陽諸水由此入洮湖

洮湖

即長蕩湖在縣北二十五里與金壇宜興分界舊有八十浦口後所存二十七東通蓬塍河北入瀆

湖東達於太湖

沙漲滄

在縣北二十里

古瀆

在縣北二十里與瀨溪通

徐

角滄

在縣北十里

蔣塔滄

在縣北五里

塘下滄

在縣北三里

盤龍澗

並在溧陽北

金陵溪

在溧陽南六十里源發廣德馬蹄泉至新橋入河流會於荆溪

上湖澗

在縣南六

十里源出廣德州東北流合白雲溪入太湖

渦溪

在縣南五十里近銅官山

魯里

渰

在縣南三十六里

舉善溪

在縣南三十里源出廣德東北流入高友溪

高友溪

在縣南二十里源出廣德經黃墟蕩合於白雲溪

谷溪

在縣南十里源出青山北

瀨水

古縣渰

在縣南十五里

下湖

在縣南十里周五里流入白雲溪東

入太湖

黃墟蕩

在縣南十里周五里東北流入白雲溪

縹車澗

在縣南十

里上接黃墟蕩  
下通白雲溪

百丈溝

在縣南三里一名百步溝  
源出燕山東流入白雲溪

曹塘澗

橫澗皇澗俱  
在溧陽南

白雲溪

即白雲涇在溧陽東六十里東流入  
荆溪又城南山川壇東亦名白雲溪

朱湖

在

東南  
八里

戴埠港

在縣東  
南五里

橫邏瀆

在溧陽東七里南接  
白雲溪北通洮湖

千里湖

在縣東十五里西  
南與古縣渚相連

蓮湖溪

在縣東十八里西通洮  
湖東入宜興之泚利渚

梅渚湖

在建平北三十里歷溧陽  
三塔湖洮湖以達太湖

南湖

在固城湖南屬宣城縣李公點寧國志曰湖廣四十里東受溧陽廣德建平諸水宣城諸溪漲亦瀉

入馬諸溪南入者曰洪林河西曰西溪南曰岳嶼溝湖泛則自西南出曲河至油榨溝西北出湖北河至渾水港俱與大河合北至水陽慈溪亦東合高淳水游流而進東通五堰以達太湖已上諸水俱由西北入於太湖

杭州府水源

按東吳水源天目為大屬杭州臨安者曰東天目為陽屬湖州安吉

者曰西天目為陰

天目之陽發源為餘不溪自臨安餘杭入錢塘界為安

溪又為鳳口溪東南入德清界折而東北流有吳羌

山之石壺泉匯而為龜溪又越山之瀑布泉石壁山之月泉皆來會而東又散入桐鄉之運河東溪橫河皂林諸涇又分支為北流水其施諸溪亦來會東行二十里入歸安至敢山漾漾水合焉過菱湖湖水合焉西北過荻港碧浪湖折而西為大灣入府城南門又前溪自武康銅峴諸山歷縣治一北流黃隴山沙村又北流水自德清縣治東清河橋下沙村與前溪水合有黃蘗山源發而為黃浦又妙喜山源發而為

妙喜港又王村諸山源發而為黃墅港又菁山源發而為官澤水皆來會北經峴山漾合埭頭橫山諸水入府南門總會於府前之江渚匯又苕溪支流入西門亦匯焉是為霅溪受諸溪之水迤邐北行過倉橋溪灣出迎春門與峴山漾合大會苕溪諸水於毘山漾散入大錢小梅并烏程諸瀆以入太湖一支東折過八里店為運河即荻塘東流為舊館為潯溪由吳江七十二漚入太湖東荻塘至平望合鶯脰湖瀾溪

諸水截吳江運河入汾湖三白蕩轉入澱湖三泖

西湖 源出天竺諸山發玉泉武林泉冷泉茯苓泉白

河泉大悲泉寒泉叅寥泉後僕夫泉一勺泉寒光泉

惠泉噴月泉法華泉真珠泉虎跑泉凡十六匯而為

西湖二派東洩一由城堧石函以入杭城運司前分

布諸河一由昭慶寺橋北行西折歷三閘為下湖河

分支入武林水門為大河即鹽橋運河與運司水會

從鳳山門出東行十二里至龍山閘北與候潮門水



會為外沙河循城而北至永昌門北過清泰慶春二  
門與內河合仍循城轉西至會安壩下注艮山河西  
入泛洋湖東北至德勝壩是為上塘河由下塘河入  
嘉興界

下塘河 自上塘河分支西北行過德勝橋至江漲橋  
與子塘河合流至北新橋西北入湖州界曰下塘河  
北接新開運河

下湖河 即運河在杭州城東北一派由溜水橋沿東

西馬塍至賣魚橋西合餘杭塘河一派由打水漫南折至江漲橋入一派由八字塘至古塘橋下折入一派由西堰橋至飲馬山亦折入餘杭塘河

南上湖 南下湖 在餘杭縣南源發自天目由臨安來南從石門入兩湖東流為南渠河又東為餘杭塘河

餘杭塘河 在武林門外自江漲橋西四十五里至餘杭縣北通新開運河

新開運河 在武林門外北新橋之北通蘇湖常秀等  
府 西溪自武林山北下流入湖州界

子塘河 在今江漲稅司北為新河頭北行經米市橋  
入清水潭過左家橋西達餘杭塘河北達新開運河  
官塘河 去杭城西北三十五里南接北新江漲橋北  
達奉口河

奉口河 去杭城西北四十五里西南接錢塘奉口大  
溪西北抵德清縣界

新江塘河 在海寧縣東北二十里其源自德清縣大麻溪之支派由莊婆堰西北東流抵縣城濠逶迤七十餘里而支港甚多東北入嘉興界

洛塘河 在海寧西北三十里乃新江塘河之支流東入硤石南湖迤北入嘉興長水塘河

已上諸水北由湖州入太湖東由嘉興入黃浦

### 湖州府水源

天目之陰自險潭歷金石為廣苔山發源為苔溪一名

大溪至荻浦荻浦溪水來合過除口至山公潭潭水  
來合至歸山下洛溪水來合至西嶼橫溪水來合過  
孝豐縣東下鉛干如湖水來合經石虎山至安吉州  
境邵渡丘渡獨松嶺水來合至南嶼南嶼山水亦合  
焉至塔潭分支西北者為裏溪大支西行者為外溪  
裏溪西行至石埭埭水來合又西龍湖水來合至石  
鼓堰堰水曹埠水西坑瀆水皆來合其外溪東北行  
也揚子湖邸閣水同來合至馬家瀆瀆水來合又至

丁埠前岡水來合過富山塘紫溪之水來合內有姚湖五湖四龍湖五龍湖南獲湖皆通貫交組於其中至浮石山裏溪之水復來合至梅溪鎮梅溪與渾水瀆水皆來合一支北行經歸安入凡常湖歷荆溪相見灣以下總自廣苔而來故以苔溪名其細別東溪有四源一派董嶺入江渚溪一由移風白水灣歸石溪一自幽嶺經碧門為碧溪一接鉛干從泥灣為紫溪又地浦灘總四流一自銅山港一自餘杭獨松嶺一

自母康塢一自武康石羊里及馬家瀆丁埠港總入於外溪又寺前港總三流一自清松里一派郎村塢一派西坑溪及九龍南溪故郵港汪家溪石埭溪總入於裏溪又渾水瀆總四流一自孝豐西茂湯灣一自曹家溪一自廣德源洋一自亮門塘入於苔溪又梅溪總三流一出四安溪一出海潭溪一出車檣灣入於苔溪又荆溪總三流一出沙埠港一出長興陳溪一出長興小溪港四安溪南出石澗盤澗塘善岸

塘合廣德水經塔水塘下苔溪和平諸山出潘店港  
棲賢水及祝家港白田港鈕家港出呂山塘下入苔  
溪又白峴山源諸山之水東過懸脚嶺水入焉又  
為楊店水東過蒼雲嶺之梓方澗澗水會而為合溪  
南過竹山塘塘水入焉又東過菴畫溪溪水入焉過  
趙瀆入太湖又顧渚山金河泉達于滙而為水口鎮  
水口東南歷紫花澗分折東北趨德成橋入太湖其  
水口鎮東分為盧祥湖折而東北趨上新橋入太湖



○白石山發源為青山港南會於苔溪二水合流為常豐澗歷黃坑潭入太湖

天目又一源東發為南溪一源南發為馬溪又高陸山源發為猷溪俱自臨安入餘杭至雙橋合流為雙溪東過徑山港徑山源水來會東入河港過靈源港入錢塘界通會於塘河又澁水出雙林山半瀑入太溪由拳青嶂山發源有二一為東溪東北經錢塘界北折入德清縣又高陸山一源發而東北過仇山之北

獨松嶺一源發而東至仇山之下二水合流而北過  
盧公橋十二里入苔溪

前溪 在武康縣前其上源即阮公潭餘英溪在縣後  
曰後溪出烏回山經龍尾橋而東曰新溪其北與前  
溪合曰封溪由縣東出前溪東南即風渚湖也又東  
為沙溪東北為長安溪南為湘溪北為埠溪西北為  
雙溪並東北入於太湖

餘不溪 在德清縣南其水清徹餘則否故名其支流

曰內河曰馬厄河曰烏山港 北流水自餘不溪至  
縣東分流入清河橋北至沙村與武康前溪水合又  
北至峴山漾合餘不溪入定安門至江子滙是為雪  
溪之派

梅溪 在安吉即東西裏外諸溪之合流下入荆溪經  
吳山西北注太湖東一支合雪溪繞郡城亦下荆溪  
荆溪安吉州北五十里其源自順零諸山東過梅溪合  
小溪港注太湖 龍溪發源天目之陰下經荻浦陳

全  
卷二  
安除口山公潭至歸山與太平仙溪水合至孝豐下  
鉛干為苔溪之派

青塘 在迎禧門外屬歸安東北接龍溪入太湖 盛  
家港橫涇港俱南接苔溪北入太湖

四安溪 在長興縣南三十里一名周瀆東北入太湖  
餘吾浦縣東南即宜興之東鄉也其東入於太湖

顧渚溪 在縣東三十里源出顧渚山至水口東入太  
湖 菴畫溪縣西七里 合溪 在縣西北二十四

里源出義鄉白峴飛雲諸山 包洋湖 在縣東北  
十五里並東入太湖

已上諸水北由七十二澗入太湖東由荻塘入吳  
江界

七十二澗

烏程之澗三十八 小梅港西山港顧家港官瀆港張  
婆港宣家港陽瀆港泥橋港寺橋港大錢港計家港  
陽澗沈澗羅澗大澗新涇澗潘澗諸澗胡澗和尚澗

張港漙幻湖漙西金漙東金漙趙漙許漙楊漙謝漙  
義高漙陳漙薄漙五浦漙蔣漙錢漙新浦漙石橋漙  
湯漙盛漙宋漙喬漙

長興之漙三十四 王村港蔣家漙上周漙長大廟漙  
烏橋漙夾浦漙謝莊漙丁家漙坍缺漙鷄籠漙沈漙  
漙杭漙瀆漙盧漙金鷄漙石屑漙殷南漙瀆漙斧浦漙  
福緣漙石瀆漙後村漙新塘漙竹篠漙徐家漙百步  
漙新開漙花橋漙葵浦漙坍溪漙徑山漙盧圻漙白

茆澗小陳瀆澗寶瀆澗

大錢港小梅港總苔雪西南衆水以入於湖港之最大者也此又不在七十二澗之數

嘉興府水源

幽湖 在嘉興西南屬秀水縣南納陡門諸水北由新城塘盧漑塘分入車溪爛溪 車溪在郡西北七十一里濶六丈今名斜港南自桐鄉西自烏程會流入溪北達於爛溪 麻溪芝溪在郡西南承桐鄉烏程

諸水合爛溪北入鶯脰等湖 韭溪在郡西即鴛鴦湖之支流也南自運河分流北入吳江界

錢家溪 在郡西北二十五里濶一十餘丈水從毛家港來分為二道一支北行入和尚蕩鴈蕩一支東行入白虎港並入吳江界 南北和尚蕩鴈蕩在郡西北其西南俱接橫塘河北入吳江揚溪 東郭河在郡東北五里水從相家湖來東往嘉善界二十五里北行復入吳江界



永新涇 屬桐鄉皂林東去十里永安鋪之東自運河  
分支北流入涇直抵爛溪 康涇運河之北曰通涇  
南曰康涇居皂林之中南通陳莊等河凡十北由烏  
鎮市抵爛溪為吳江界 爛溪在永新涇東北二十  
里南濱桐鄉者為東爛溪又東行二十里出秀水界  
北入吳江鶯脰湖

相家湖 在嘉興縣東九里受西南衆流東入團港至  
嘉興北入吳江界 穆溪在縣東北南接海鹽上谷

湖西接幽湖諸水北入吳江界 王江涇在縣北南  
受運河西受聞店麻溪諸水北入吳江界

許家蕩 南北夏墓蕩 在嘉善西北俱北入汾湖東  
入西白蕩 汾湖縣西北西納王江涇鶯脰湖諸水  
東入三白蕩 蘆墟三白蕩縣西北西納汾湖諸水  
東入龜蕩為青浦界

已上諸水並南自嘉興北入吳江

平川一名西塘在嘉善北西承爛溪諸水東北入於澱

湖三泖 魏塘又名武塘在嘉善縣後西南承嘉興諸水東入秀州塘

海鹽塘南接海鹽諸水北入馬場湖東由七里橋達松江界內

嘉善塘合嘉興秀水桐鄉諸水泝白蓮寺而東三十五里至嘉善入秀水塘濶三十餘丈至是水疾流迅由楓涇北入三泖

平湖塘廣三十餘丈西南接焦山門橋迴而東注與馬

場湖海鹽之水會流經嘉善界以達於松江

楓涇 在嘉善東北即白牛塘一名清風涇南承嘉興諸水北入三泖東入珠涇以達橫潦涇

上谷湖 在海鹽縣西南六十里東入宋坡湖 宋坡湖 在縣西四十里南臨大海下流合於澈浦 澈浦 在縣西三十里東北匯於當湖

當湖 在平湖縣東上承澈浦以西諸水東下石牌涇 石牌涇 在縣西北三十里承平湖東下之水由麩杖

等港入於長泖 東泖在縣東北西南納當湖諸水  
東北入於黃浦

又有乍浦獨山塘沈清官塘官田廟港張家滙俞塘蘆  
涇浦丁家漾白涇界涇大茫塘此皆南承浙水北達  
於松江者也

已上諸水俱由西南入於黃浦

三吳水考卷二